

*Item*, fo balotà una paga di stratioti, quali si vol mandar in Friul a custodia, per dubito di qualche incursion di turchi; et scritto a Udene fazi tutte le bia-ve di l'intorno, per bon rispeto, redurle in Gradiscæ. *Item*, io fici balotar ducati 220 di la fabricha da esser tolti dil consejo di X, et mandati a Zara per compir la forteza di Nadino, et conzar l'Aurana, et fici scriver.

*Da Dulzigno, di sier Piero Nadal conte et capitano do lettere, di 15.* In una risponde zercha le munition, avisa sono ben in hordine, dice non haver dato a niuno. Per l'altra, come ha da Scutari l'armata esser zà principiaa a ussir di Streto, et che il capo era aviato verso Napoli di Romania, et zà era fato le spianade.

Vene Hironimo de Monte vice colateral, et referi la condition di li condutieri nostri, perchè si vol far la mostra, et stevano mal le zente d'arme. Et poi intrò Zuam Filippo Aureliano, et *etiam* lui disse l'opinion sua, qual à gran praticia di colateral, et intrò li cai dil consejo di X, mandati tutti fuora.

Da poi disnar fo pregadi. Et da saper fici lezer la lettera dil Zante, di 7. Scrive come sier Renier Vituri vien da Retimo, dove morite il padre, retor, qual zonto li al Zante si parti con uno navilio, dubita non sia preso da' turchi, nulla fu.

*Da Milan, di l'orator, di 19 da sera.* Come era stato col ducha, et parlato zercha le farine tolte a Roverè, che non era vero; disse il ducha questo medemo l'ho scritto al re, et mel pensava non era il vero.

*Da Roverè, di sier Nicolò da cha da Pexaro podestà, di 20.* Come era tornato uno suo messo di Trento. Dice esser zonto li misier Jorio di Petraplana, et ha referito il campo regio, a di 17, era a Slanes dove è il re di romani, et che agnelini et sguizari erano ingrossati da persone 20 milia, et che mercore doveano esser a le man; quello seguirà aviserà justa el solito suo.

*Da Corphù fu leto una lettera.* In la qual era, in una deposition: come il capitano di l'armada turche-scha manderà uno bregantin al capitano zeneral a dirli la lasci passar per le aque di Corphù, perchè vuol andar con l'armada soa a la Valona, et dagan-do verà a tuor Corphù, et non dagan-do transito anderà in Puja. *Item*, par il capitano di l'armada sia il fiol fo di Chazergo, ch'è bassà.

329 In questo pregadi fo provado li tre patroni di Alexandria, zoè sier Marco Querini q. sier Giacomo, sier Priamo Contarini, et sier Silvestro da Leze di sier Giacomo, et tutti rimaseno per il bisogno presente di l'armada.

*Item*, fu messo, per li consejeri, parte: che sier Zuam Morexini electo ducha di Candia, et sier Alvixe Barbarigo electo capitano et provedador a Napoli di Romania, debino andar ai lhorò rezimenti con le galie, et fu presa.

Et poi il principe si levò, et parlò sapientissima-mente dil pericolo si era, et che il Turchò era cossa molto paventosa facendo gran paura: laudò nui savi ai ordeni, quali soli havevano fato sì grande armada, et non nominò li altri savii, confortoe tutti a pagar le so decime, et quelli sono debitori a le raxon nuove et altri officii pagino volentieri, perchè si non provedeva si perdiria il stado da mar etc.

Fu posto, per il principe, consejeri cai di XL, savii dil consejo et di terra ferma, che tutti li debitori de li officii vadino a pagar per tutto il mexe presente senza pena; have do di no, et fu presa.

Fu posto, per tutti li savii, quali introno in l'opinion nostra di nui savii ai ordeni, di elezer de presente per scrutinio do provedadori, uno in la Morea, l'altro a Corphù, con ducati 100 al mexe per uno per spexe, menino 8 famegii et uno secretario di la cancelaria nostra in ditto numero, et debino risponder questa sera, et partirse in termine di zorni tre. *Item*, mandar 4000 milia stera di formento a Corphù, et altre munition, et 300 fanti sotto li contesta-beli parerà al collegio, quali debino andar su le galie grosse da esser messi dove sarà el bisogno: ave 12 di no, el resto di sì, et fo tolto el scrutinio. Et il principe si levò e andò a caxa, et rimase sier Andrea Zanchani, in la Morea, qual *statim* refudò, et sier Piero Marzello a Corphù, non era lì, *tamen* poi *etiam* lui refudoe, et il scrutinio sarà posto qui driedo (1).

Fu posto, per tutte tre le man di savii, di armar 5 nave sono in questa terra, zoè quella di sier Andrea et Alvise Soranzo, quella di Malipiero che fo Mema, et la Vendramina, con il precio fono tolte. *Item*, la Donada patron Martin da Cherso con homini 100, ferma di 4 mexi, et ducati 500 al mexe; et il belingier di Pexaro, con homini 90 et ducati 400 al mexe: debino i parzionatevoli risponder da mattina, et con tutti li modi di le altre, et caucion: *aliter* non volendo armar siano tolte a raxon di ducati 40 per centener di bote, *juxta* la leze. *Item*, di armar 4 altre galie sotil, et have tutto il consejo. Et fazendosi el scrutinio di provedadori, leto la lettera di Corphù, quali voleno armar 60 gripi, fici notar una parte di acetar la sua oferta, et leta a li savii parse tutti de intrar in opinion, quali fono sier Filippo Trum procurator, sier Constantin de Prioli, sier

(1) Non c'è, ed invece trovati nell'originale uno spazio bianco.